

schwebt / so het eben diser schuß / *manens eodem loco* ein andere gestalt ge-  
wonnen / vnd hette der *Comet directus* geschinen / were (nach dem die  
Erd einen zimlichen weg herüber kommen) *retrogradus* worden vnd  
entlich wider *directus*.

D. Rößlin. *Saturnus* weichet allein 7 grad / *Iuppiter* 10, *Mars* 18 zu-  
rück / der *Comet* aber ist vier ganzer *signa* zurück gewichen.

Keppler. Das macht / das er nit wie die Planeten / nach seinem was-  
ren lauff einen *circulum* helt / sondern ein gerade lini fort schiesset : derhal-  
ben er auch nit in einem gezirck gebliben / wie die Planeten / sondern etliche  
ganze *sphaeras* durchschossen.

D. Rößlin. Wie vnderwirff ich mich *Kepplero*, als einem scharffsin-  
nigen *Astronomo*, ob man auch dermahlen eine *communem doctrinam de*  
*motu Cometarum* an tag bringen möge.

Keppler. Ein gut Wort ist Lohns wehrt. Sag derhalben / das  
die *Cometen* vngleich / vnd nit alle so richtig / wie etliche zu vnserer zeit :  
vrsach / dann ihr *Corpus* bleibt nit einerley / sondern verzehret sich / also das  
ich zimlich starck erweisen / das der schwanz vom *Cometen* sey ein *efflu-*  
*xus ex corpore*, außgetriben durch die Sonnenstraalen. Was nun ein  
*Comet* auff einer seiten mehr abnimbt dann auff der andern / so muß fol-  
gen / wie in einem polß / dem man auff einer seiten das gefieder stümlet /  
das des *Cometens* schuß krumb wird : da ist es alsdann geschehen vmb die  
*Astronomos* ; die müssen gewisse *fundamenta* haben. Das ich nun der  
fürsorg bin / es möcht diser fehl bey etlichen *Cometen* sich finden / dahin  
bringen mich etliche *Exempla* der *Cometen* : Als das auff eine zeit auß  
einem *Cometen* zwey worden seind. Item das ein *Comet* geleuchtet /  
nit rund / sonder tropffecht / wie ein wölklein / da kan es mit dem lauff nit  
gerad zugehen.

Wann aber alle *Cometen* weren wie der nechste des 1607 Jahrs /  
sölten meine *Theoremata* ( die ich bey abhandlung jetztgemelten *Cometens*  
des 1607 zusammen geschriben / *ad investigandum situm trajecto-*  
*riae lineae Cometae*, so aber nit gedruckt / sondern mir wider zu Haus ge-  
schickt worden) nit der geringeste grund zur sachen seir. Vnd hab

D. ij.

ich